

ԵՐԶԱՆԻԿ ԳԵՒՈՐԳԵԱՆ
ՍՈՒՍԱՆՆԱ ԳԵՒՈՐԳԵԱՆ

**ԿՐԿՆՈՒԹԻՒՆ ՈՃԱԿԱՆ ՄԻՋՈՅԸ
ԳԱՐԵԳԻՆ ՆԺԴԵՀԻ ԵՐԿԵՐՈՒՄ**

Սոյն ուսումնասիրութեամբ, փաստական առատ նիւթի հիման վրայ փորձ է արւում քննելու Գարեգին Նժդեհի գործածած ոճական լեզուամիջոցներից կրկնությունը (կրկնաբանությունը): Տեսակներն են՝ **հնչյունային** (կրկնուող հնչյուններ կամ հնչյունակապակցություններ), **բառային** (կրկնուող բառեր), **շարահիւսական** (կրկնուող նախադասություններ կամ նախադասութեան հատուածներ): Ինչպէս յայտնի է, այս տեսակները կարող են հանդէս գալ մէկ նախադասութեան ներսում իրարայաջորդ կերպով՝ **միաշար** կամ որպէս **գուգահեռություններ**:

Վերջիններիս տարատեսակներն են սկզբնակրկնությունը՝ յարակրկնություն (անաֆորա), վերջնակրկնությունը (էպիֆորա), միջնակրկնությունը (հեղ. հեղ.), նոյնաբանությունը (տաւտոլոգիա), բաղիւսումը (սիմպլոկա) եւ խաչակերպը (խաիզմ)¹: Ներկայ դէպքում յարակրկնությունների պարագայում կրկնությունը տեղի է ունենում անմիջականօրէն մօտ կամ քիչ հեռու նախադասությունների կամ պարբերությունների սկզբում: Վերջնակրկնությունները լինում են անմիջականօրէն մօտ կամ քիչ հեռու նախադասությունների եւ կամ պարբերությունների վերջում, իսկ միջնակրկնությունները՝ նախադասությունների միջնամասում: Բաղիւսումները կարող են լինել իբրեւ արդիւնք յարակրկնությունների ու միջնակրկնությունների կամ վերջիններիս ու վերջնակրկնությունների, և կամ յարակրկնությունների ու վերջնակրկնությունների միահիւսման:

Ինչպէս կտեսնենք, խաչակերպները եւ նոյնաբանությունները անհամեմատ սակաւ են հանդիպում: Զննութեան ընթացքում, ըստ հարկի, կնշուի կրկնութեան տեսակը, դրսեւորման եղանակը կամ տարատեսակը:

Կրկնությունը (կրկնաբանությունը) Գարեգին Նժդեհի ստեղծագործություններում խիստ տարածուած ոճական միջոցներից է: Այն հանդիպում է թէ՛ գեղարուեստական, թէ՛ գիտական երկերում, ինչպէս նաեւ կոչւերում ու նամակներում: Որպէս ճարտասանական հնար՝ թերեւս աւելի յաճախ է գործադրւում, քան հռետորական հարցը:

1 Տե՛ս Հ. Զ. Պետրոսեան, Հայերէնագիտական բառարան, Երեւան, 1987, էջ 507:

1. **Կրկնությունների բազմազանությունը եւ քանակական կողմը:** Հնչիւնային, բառային շարահիւսական տեսակներից առաջինը հազուադէպ է լինում, ուստի սկսենք բառայինից: Ամենապարզունակը *ն'չ, ո'չ, չէ', չէ'* ժխտական վերաբերական (եղանակավորող) բառերի կրկնությունն է՝ վճռականություն արտայայտելիս, որ հանդիպում է գործերի մեծագոյն մասում՝ մեծ, թէ փոքր: Համաձայն բառային տեսակի պահանջի՝ մէջբերենք նմուշներ, որտեղ կրկնում են առանձին բառերը. «**Ցեղօրէ՛ն, ցեղօրէ՛ն** ապրենք, որպէսզի... Վարդաններն ու Վահաններն անպակաս լինեն Հայոց աշխարհում»², «**Ձգո՛յշ, զգո՛յշ**, դարձեալ **զգո՛յշ**, ...ահա՛ արդի քաղաքական պահի հրամայականը»³, «**Քաջերին, միայն քաջերին** է զորաւիգուս պատերազմների քմայաճ Աստուածը»⁴, «...կրեցիր անմարդկային գրկանքներ... մտածելով **միա՛յն, միա՛յն** ուրիշների մասին» (Հ., էջ 596): Այս չորս օրինակում գործածուած են բառային միաշար կրկնություններ: «**Ռո՛ւ**, երիտասարդ գրուցընկեր, **դո՛ւ**, որ հրամայողաբար պիտ լինես ուժեղ, **դո՛ւ** ես ապաւինիր վսեմ մտածումի փրկարար ոյժին» (Հ., էջ 102): Իսկ այստեղ բառային յարակրկնություն է, քանի որ *դու* բառը հանդես է գալիս նախադասությունների սկզբում:

Շարահիւսական տեսակի պահանջով բերենք նմուշներ, որոնցում կրկնում են ամբողջական նախադասություններ. «...ամէն տեղ կրկնէք հպարտութեամբ՝ **մենք էլ հայ ենք**: ...Ձեր նոր աղոթքը թող լինի՝ **մենք էլ հայ ենք**» (ԱՍ), «**Գիտենք այդ ամէնը**: ...**Գիտենք այդ ամէնը**, տեսնում ենք, թէ ինչպէս աստիճանաբար բարձրանում է թրքական տապարը... **Գիտենք այդ ամէնը**, անհանգիստ ենք, բայց **ոչի՛նչ, ոչի՛նչ** չենք անում...» (Հ., էջ 127): Առաջին հատուածում շարահիւսական վերջնակրկնություն է: Երկրորդ հատուածում շարահիւսական յարակրկնություն՝ համատեղուած միաշար բառային կրկնութեան հետ:

Բազմաթիւ են դէպքերը, երբ միեւնոյն նախադասութեան կամ կից մի քանի նախադասութեան մէջ առկայ են զանազան կրկնություններ: Հետեւեալ հատուածներում երկուական են. «**Նա կուել է**, անդադրում **կուել է** գիշեր-ցերեկ... բայց եւ այնպէս նա **ապրել է, ապրել է**, որովհետեւ ունեցել է վեհ հաւատ»⁵, «...էն **մենք** ենք, **մենք**, որ եօթն անգամ **ոյժեղ**, մահից էլ **ոյժեղ** գիտենք ատել մեր դարաւոր թշնամուն...» (Հ., էջ 422), «**Ռու է՛լ, դու էլ** կարող էիր հարուստ լինել, բայց... **մեռար** մենաւոր, **մեռար** անշուք ու չորս պատերի մէջ, **մեռար** ինչպէս վայել է մեռնել հոգով մեծերին» (Հ., էջ 597): Առաջին հատուածում կրկնում են *կուել*, *ապրել*, երկրորդում՝ *մենք* եւ *ոյժեղ*, երրորդում՝ *դու էլ*, *մեռար* բառերը՝ բոլորն էլ միաշար եղանակով:

2 Գ. Նժդեհ, Հատընտիր, Երեւան, 2006, էջ 486: Այսուհետեւ սոյն աշխատութեան վերաբերեալ յղումները կնշուեն շարադրանքում (Հ., էջ ...):

3 «Ռազմիկ» օրաթերթ, 1943, թիւ 169-174:

4 Գ. Նժդեհ, Ազատ Սիւնիք. «Հայրենիք» ամսագիր, 1925, թիւ 10: Այսուհետեւ սոյն յուշագրութեան վերաբերեալ յղումները կտրուեն շարադրանքում (ԱՍ):

5 ՀՀՊԱ, ֆ. 198, ց. 1, գ. 73, թ. 19-20:

Յաջորդ երկու հատուածում կայ երեքական կրկնութիւն. «Մէկ էլ **կրկնեք** այդ սրբազան խօսքերը: **Կրկնեք ամեն օր, ամեն ժամ եւ ամեն տեղ, կրկնեք** հպարտութեամբ (ԱՍ), «...**բոլորը, բոլորը** պիտ համակին նոր մտայնութեամբ, պիտ **կրկնեն** նոր ճշմարտութիւններ, **կրկնեն** անվերջ, անդադրում, **մինչեւ որ...** ինքնապաշտպանութեան գաղափարը դառնայ ժողովրդական մտայնութիւն... **մինչեւ որ** հայութիւնը դառնայ ինքնապաշտպանունակ» (Հ., էջ 65): Առաջինում կրկնում են՝ *կրկնեք, ամեն, երկրորդում՝ բոլորը, կրկնեն, մինչեւ որ*: Ըստ որում, *ամեն* և *բոլոր* բառերը միաշար կրկնութիւններ են, իսկ *միւսները* զուգահեռութիւններ են՝ յարակրկնութիւններ՝ միահիստում միջնակրկնութիւնների հետ: Ինչպէս դեռ կտեսնենք, տարբեր կրկնութիւններ կազմող բառերն ու նախադասութիւնները կարող են լինել չորսը, հինգը կամ աւելին, մանաւանդ, եթէ հատուածներն աւելի մեծ են:

Խօսքաշարերում, խօսքի մէջ կրկնութիւնները տարբեր բաշխուածութիւն ունեն: Որոշակի դէպքերում, համաձայն համաբնագրի, դրանք գործածուած են մէկ նախադասութեան մէջ՝ անմիջաբար՝ միաշար, միմեանցից անջատուելով ստորակետով, երբեմն՝ կախման կետերով: Սա առաւելապէս վերաբերում է բառերին ու բառակապակցութիւններին: Յուզական տեսակետից այսպէս յաջորդական լինելն աւելի արտայայտիչ է. «**Ամեն ինչ, ամեն ինչ** նրա (Քեռու՝ Արշակ Գաֆաֆեանի) մէջ մատնում էր Հերոսին»^{6*} (Հ., էջ 410), «Ապրեց (Եւուորովը) ...եւ **տառապեց, տառապեց** գերմարդկօրէն: ...երգեց եւ հայ ցաւը: ...երգելէ առաջ **ապրեց, ապրեց** խորապէս» (Հ., էջ 590-591), «**Գարշի՛ր, գարշի՛ր** թուլութիւնից - եւ պիտ ուզենաս լինել եւ պիտ լինես ոյժեղ» (Հ., էջ 142): Այլ դէպքերում մէկ նախադասութեան մէջ կրկնութիւններն ընդմիջում են բառակապակցութեամբ, դերբայական դարձուածով, իսկ աւելի մեծ ընդհատումներով անջատուելիս՝ նախադասութեամբ, յաճախ կրկնուող բառը պարզաբանող երկրորդական նախադասութիւններով. «**Այսպէ՛ս**, ցեղից պարպուած ժողովուրդներին, **այսպէ՛ս** է պատժում պատմութիւնը» (Հ., էջ 619), «Հայ ոսկեբերանն է նա (Աւ. Ահարոնեան): Նա **խօսքեր** ունի... **խօսքե՛ր**, որպէս վառուող կերոններ. **խօսքե՛ր**, որոնցից արիւն կը կաթի, **խօսքեր**, որոնք կը շնչեն, հոգի կու տան» (Հ., էջ 149): Հետեւեալ ընդմիջուածութիւնն աւելի մեծ է՝ մի քանի նախադասութեամբ. «Կուգէի, որ դո՛ւ, հայ երիտասարդ, որ դու իւրացնէիր ինքնաճանաչութիւնը... **Ծանի՛ր զքեզ**»: Մի նախադասութիւն անց. «**Ծանի՛ր զքեզ...** իմաստասիրական այդ հրամայականը...»: Մի քանի նախադասութիւն անց. «Ինքնաճանաչմամբ մարդը դառնում է ինքնավստահ... **Ծանի՛ր զքեզ**» (Հ., էջ 95-96): Երկերում կան էլ աւելի մեծ ընդմիջուածութեամբ կրկնութիւններ՝ անջատուած մի-մի մեծ պարբերութեամբ, էջով կամ էջերով, որոնց մասին դեռ խօսք կլինի սոյն յօդուածում:

Այժմ, այն մասին, թէ Նժդեհի երկերում յարակրկնութիւնները նուազա-

^{6*} Հասարակ գոյականի մեծատառով գրութիւնը Գ. Նժդեհինն է:

գոյն երկուսից բացի եւս քանի անգամ են կրկնուում: Քանակական աճին համապատասխան՝ նմուշները ցոյց կտրուեն մեկական օրինակով:

Եռանդամ յարակրկնություն. «**Անդրօշա՛կ - անցե՛ղ, անպատի՛ն, անհայրենի՛ք: Անդրօշա՛կ - անսի՛րտ, անսո՛ւրբ, անհոգի՛:** **Անդրօշա՛կ - անարի՛, աներկի՛նք, անդէ՛ն**» (Հ., էջ 225): Հատուածը «Ամերիկահայությունը - ցեղը եւ իր տականքը» աշխատությունից է: Բնորոշումները վերաբերում են այն զինուորներին, որոնք հեռացել էին լեգեոնական միությունից ու հրաժարել հայոց եռագոյն դրօշակից: Եռանդամ հարակրկնության դասական նմուշ է՝ տարողունակ բովանդակությամբ եւ ինքնատիպ կազմությամբ: Ուշագրաւ է, որ *ան-* նախածանցի տասներկու անգամ կրկնությունը ստեղծում է տպավորիչ հնչյունակապակցական կրկնություն, ինչը հագուադէպ է քննուող արձակ նիւթերում, քանի որ առաւելապէս յատուկ է չափածոյ խօսքին:

Քառանդամ բաղիւսում. «...*Ժխտականությունը հետեւանք է նախ իրենց* (բուլշեւիկների) *բարոյական քանդուածութեան* ^{7*}... **Չկա՛յ** Աստուած, բարոյականություն **չկա՛յ**, ազգություն **չկա՛յ. չկա՛յ...**» (Հ., էջ 207): Մէջբերումը դարձեալ վերը յիշատակած աշխատությունից է: Համապատասխան նոյն միտքը հնարաւոր է արտայայտել բազմակի ենթականերով, մէկ՝ *չկայ* ստորոգեալով: Բայց կրկնությունը քառանդամ է, ուրեմն՝ այդ կերպ՝ աւելի յուզական:

Հնգանդամ ընդմիջուած միաշար կրկնություն. «Բայց եւ այնպէս պէտք է **ապրել, ապրել՝** անհանգիստ հոգիով, **ապրել՝** թրքական եղեռնի ամբողջ յիշողությամբ, **ապրել՝** ցեղօրէն, **ապրել՝** - ամոթ համարելով մեկուսի եւ եսական երջանկությունը...» (Հ., էջ 500): Այս յուզական կոչը «Յեղային արթնություն» աշխատությունից է ու հինգ անգամ ներշնչում է ապրելու ձգտումը:

Վեցանդամ յարակրկնություն. «Մեռնելու կամք» յօդուածում վեց պարբերություն սկսում է *հերոսս է* բառերով. «**Հերոս է** նա, որի համար կյանքն արդարացում ունի... **Հերոս է** նա, որի հայեացքը ուղղւած է յաւիտենականին... **Հերոս է** բիբլիական Գեղեոնը... **Հերոս է** Կլեմանտն... **Հերոս է** Քեռին... **Հերոս էր** Ղանտոնը...» (Հ., էջ 560): Եւ այս վեցանդամեայ կրկնություններից իւրաքանչիւրին յաջորդում են հաստատող պարզաբանումներ:

«Իմ օրագրէն» աշխատութեան մէջ *ոյժեղ* բառով կազմուած է եօթանդամ յարակրկնություն (Հ., էջ 27-28): «Ազատ Սիւնիք» յուշագրութեան մէջ առկայ է «...*ոյժեղը նա չէ*» նախադասությամբ ութանդամ յարակրկնություն՝ երկար ընդմիջումներով:

«Յեղակրօնութիւնն իբր յաղթանակի գօրոյթ» յօդուածը բաղկացած է ինը մասից, իւրաքանչիւր մասն աւարտուում է «*Յե՛ղն է մեր ապաւէնը*» նախադասությամբ. իննանդամեայ շարահիւսական վերջնակրկնութեան ակնառու օրինակ է (Հ, էջ 480-489):

^{7*} Շեղ գրությունը Գ. Նժդեհինն է:

Մրցանիշայինը, թերեւս, «Եւ զոհ եւ զոհարար» մօտ երկէջանոց յօդուածն է, որտեղ հեղինակն ունի *տեսաւ* բառով կազմուած կրկնաբանական բաղ-
 հիւսում՝ բաղկացած 11 յարակրկնութիւնից եւ 4 միջնակրկնութիւնից (ընդհա-
 նուր հաշուով 15 կրկնութիւն): Պատկերում են Եղեռնի սարսափները՝ իւրա-
 քանչիւր *տեսաւ-ից* հետո՝ մէկ այլ ահաւոր տեսարան, մէկ այլ զարհուրանք,
 մէկ այլ ոճրագործութիւն... Բայց մէջբերենք այդ հատուածը եւս. հասկանալի
 է, կատարուած են կրճատումներ, մասնաւորապէս հանուած են ընդմիջող նա-
 խադասութիւնները. «...ծագող արեւը Հայաստան երկրի փոխարէն *տեսաւ* մի
 կատարեալ գեհէն: *Տեսաւ* խաչի նսեմ ստուերն ընկած մեր հազարամեայ հայ-
 րենիքի վրայ: *Տեսաւ*, թէ ինչպէ՛ն մի խաւարասեր ազգ... կը հրոսէր մի անգէն...
 Ժողովրդի դէմ... *Տեսաւ*, թէ ինչպէ՛ն կը մոխրանային... գիւղերը... *Տեսաւ* խուժ-
 դուժ գործը տապարի, եաթաղանի... *Տեսաւ*, թէ ինչպէ՛ն կը խլուէին կանայք
 ու կըռնաբարուէին: ...Գործի վրայ *տեսաւ* թրջական սանձարձակ շնութիւնը...
Տեսաւ... մեր աղջիկները, որոնք Եփրատի ալիքները կը գրկէին: *Տեսաւ*, թէ ինչ-
 պէ՛ն հայրը հաւաքեց ընտանիքին իր յարկի տակ եւ այրեց ողջ... Արեւը *տեսաւ*
 տուն, տանիք, ճամբաներ՝ արիւնով ներկուած: *Տեսաւ*... մահուան հետ կռուի
 մտած արնաթաթախ հայորդիներ: *Տեսաւ*, թէ ինչպէ՛ն «շներն ու շնագայլերը
 մեր սիրելիների սրտերը կը կրծէին»: *Տեսաւ*... վաճառքի հանուած հայ կիներ
 ու մանուկներ... *Տեսաւ*, հայոց արեւը *տեսաւ* այդ ամէնը, եւ խաւարեց այդ
 օրը» (Հ., էջ 613):

Տարբեր երկերում գործածուած են ոչ միայն բազմանդամ, այլեւ համատեղ
 մի քանի կարգի կրկնաբանութիւններ: Այսպէս. «Հայու ճամբան. մեծ զոյժու-
 մի ճամբան» յօդուածում կան տասի չափ տարբեր բառեր, որոնք կրկնում են
 համապատասխանաբար երեքից-ութե անգամ (Հ., էջ 616-620): Բազմանդամ ու
 բազմակի, բառային ու շարահիւսական կրկնութիւններ են գործածուած հա-
 մատեղ՝ 13.06.1920 թ. Ղափան Գեներալի ռազմական ոյժերին ուղղուած կոչում
 եւ ուրիշ-ուրիշ գործերում:

2. Կրկնութիւնների մի քանի յատկանիշ: Ինչպէս ընդհանրապէս խօս-
 քում, այնպէս եւ Նժդեհի ստեղծագործութիւններում, կարելի է մատնացոյց
 անել խնդրոյ առարկայ ոճական միջոցի մի քանի յատկանիշ:

ա. Խաչակերպ (շրջուն) կրկնութիւն: Շրջուն լինելը յատուկ է երկանդամ
 գոյգերին. երկրորդը առաջինի կրկնութիւնն է՝ շրջուն շարադասութեամբ: Տեղի
 է ունենում հետեւառաջութիւն, որի հետեւանքով ենթական դառնում է ստորո-
 գելիական վերադիր եւ հակառակը, հանգոյցը նախորդում է ստորոգելիական
 վերադիրին, ստորոգեալը՝ ենթակային: Մրանք, ըստ էութեան, խաչակերպներ
 (խաիզմ) են: Հաշուել ենք տասի չափ խաչակերպներ: Երեքի դէպքում տեղա-
 շարժում է ենթական՝ միւս փոփոխութիւններով հանդերձ. «Հայը լինելիական
 է, - հաստատում է հայոց հեթանոս կրօնը: **Լինելիական է հայը** - ահա՛ ական
 ու աղբիւրը մեր մեծ Յոյսի Զօրոյթի» (Հ., էջ 487), «Ճշմարտօրէն զօրաւորն է

արդար: Եւ, միայն **արդար՛ն է ճշմարտօրէն զօրաւոր»** (Հ., էջ 368): Կամ. **«Ղեկաւարը - դա ինքը զօրքն է: ...Զօրքը - դա ինքը ղեկաւարն է»⁸:**

Չորս դէպք վերաբերում է ստորոգելիական վերադրին ու հանգոյցին, որոնցից երեքում նոյն *եղիի* բայաձեւն է. «Չկորցնել չափի զգացումը, երբ դիպածը մեր ախոյանին մեր ձեռքն է յանձնել: **Եղի՛ր արդար, արդար՛ եղիր...**» (Հ., էջ 368), «Նորահաս սերունդ, ...կանչում եմ եւ ասում քեզ. - **Եղի՛ր ցեղակրօն, ցեղակրօն եղիր...**» (Հ., էջ 494), «...առաջնորդ ես, ուրեմն՝ **եղի՛ր ազնիւ, ազնիւ եղի՛ր...** - Դա ճակատագրական նշանակութիւն ունի ժողովրդիդ... համար» (Հ., էջ 578), «...խնայիր տկարներին, եթէ թշնամիդ իսկ լինի: **...Մնա՛ մարդ, մարդ մնա՛**» (Հ., էջ 392): Մէկ դէպքում բայից առաջ դրուած կոչականը շարժում է բայից յետոյ. **«Անցո՛րդ, կա՛նգ առ, կա՛նգ առ, անցո՛րդ,** այս անյայտ հողաթմբի առջեւ...» (Հ., էջ 407): Մէկ այլ դէպքում փոխատեղում են շաղկապական յարադրութեան բայերը. «Միւնիքի տեղագրութիւնը այդ երկրում շարժուողից անվերջ **բարձրանալ ու իջնել, իջնել ու բարձրանալ** է պահանջում» (ԼԳ): Խաչակերպ կրկնաբանութիւնն ասելիքն աւելի հաստատուն դարձնելու միջոցներից մէկն է:

բ. Կրկնութիւնը հարցի տեսքով: Այսպիսի կրկնութիւնը միատեղում է ճարտասանական հարցի հետ: Հարցական բառը կամ նախադասութիւնը հնչում է երկու կամ աւելի անգամ: Ճարտասանական երկու միջոցների միաժամանակեայ գործածութեան հետեւանքով ուժգնանում են մտքի իմաստային ու յուզական կողմերը: Այդպէս է հնչում **«...օտա՛րն է մեղաւոր»** հարց-կրկնութիւնն նախադասութիւնը «Օրերի օրը» հրապարակախօսական յօդուածում, որտեղ նշում է հայութեան կեանքի հինգ թերացում. **«...օտա՛րն է մեղաւոր,** որ... հայրենասիրութեան կրակն ու լոյսը չեն թափանցել մեր ժողովրդի բոլոր խաւերի մէջ: **Օտա՛րն է մեղաւոր,** երբ... հայութեան մի մասը... կը շարունակէ գործածել... շնական ժողովրդի լեզուն... **Օտա՛րն է մեղաւոր,** որ դեռ կան հայեր, ...որոնց կողմից ... հնագոյն ժողովրդի անդամ լինելը դեռ չէ գիտակցում որպէս գերագոյն երջանկութիւն: **Օտա՛րն է մեղաւոր** մեր կեանքում տիրող մտա-բարոյական անիշխանութեան համար: **Օտա՛րն է մեղաւոր** այդ բոլորի համար: Թողնենք օտարներին մեղադրելու թոյլերին յատուկ ցաւը...» (Հ., էջ 446): Նկատելի է, որ նշուած համատեղութիւնը Նժդեհի երկերում տարածուած է: Նոյն այս յօդուածում *ն՛վ կարող է* հռետորական հարցը տրուում է վեց անգամ: «Որդիների պայքարը հայրերի դէմ» աշխատութեան մէջ, մարդկութեան երջանկութեան խնդրով մտահոգ *ինչո՞ւ* հարցը կրկնում է երեք անգամ. **«Ինչո՞ւ, ինչո՞ւ** այդպէս: **Ինչո՞ւ** կը տառապի մարդկային ցեղը» (Հ., էջ 93): «Ինչո՞ւ տարօնականութիւն» յօդուածում *ն՛ր* հարցական դերանունը կրկնում է երեք անգամ՝ վերաբերելով տարբեր գոյականների. **«Ո՞ր** հայ գրողը, *ն՛ր* ճշմարիտ

8 Գ. Նժդեհ, Լեռնահայաստանի գոյամարտը. «Հայրենիք» ամսագիր, 1923, սեպտեմբեր: Սոյն ամսագրի վերաբերեալ հետազայ յղումները կտրուեն շարադրանքում (ԼԳ):

հայրենասերը, եւ մասնատրապէս, *ո՞ր* ռազմիկը Հայաստանին սպառնացող վտանգի վայրկեաններին չէ ոգեկոչել Հայրենիքի համար մեռնել ուխտած Մամիկոնեանների օրինակը» (Հ., էջ 540): «Ամերիկահայութիւնը - ցեղը եւ իր տականքը» աշխատութեան մէջ, այն կապակցութեամբ, որ ամենուրեք, կեանքի նոր պայմաններին համապատասխան ժողովուրդները կատարելագործում են իրենց հայրենիքների պաշտպանունակութիւնը, *ո՞ր* հարցը հնչում է հինգ անգամ. «...*ո՞ր*, *ո՞ր* «նոր երգ» չի երգում, *ո՞ր* հայրենիքի փրկութեան համար ձեռք չեն առնում «գերագոյն միջոցներ», *ո՞ր*, մեր երկրագնդի վրայ. ...*ո՞ր* չի գործում կեանքի բնաշրջումը» (Հ., էջ 257): Այսպէս՝ ճարտասանական նպատակներով ուրիշ-ուրիշ երկերում:

գ. Բազմաշաղկապութիւն: Ոճագիտութեան մէջ ոմանք բազմաշաղկապութիւնը համարում են առանձին ոճական միջոց, ուրիշները՝ որպէս կրկնաբանութիւն ոճական միջոցի մի դրսեւորում: Մասնատրաբար՝ այդպէս է ներկայացնում Լ. Եզեկեանը ոճագիտութեան իր բուհական դասագրքում, մի մոտեցում, որին մենք նոյնպէս հակամէտ ենք⁹: Իրոք, ի՞նչ է բազմաշաղկապութիւնը, եթէ ոչ միեւնոյն կամ անմիջականօրէն կից նախադասութիւններում շաղկապի բազմակի կրկնութիւն, որով առանձին-առանձին ընդգծում է այն ամէնը, ինչը խօսելու պահին առնչւում է ներկայացուող իրականութեան հետ: Մինչ այժմ շարադրանքի մէջբերումներում բազմիցս հանդիպել ենք գոյականների, ածականների, դերանունների, բայերի, մակբայների, ինչպէս նաեւ ոչ նիւթական խօսքի մասերի՝ կապերի, վերաբերականների կրկնութիւններին: Քննուող ոճական միջոցը առնչւում է բոլոր խօսքի մասերի հետ, ուստի շաղկապների կրկնութիւնը չի կարող բացառութիւն լինել եւ կազմել առանձին ոճական միջոց: Գարեգին Նժդեհի երկերում քննուող ոճական հնարը, մասնատրապէս, վերաբերում է *եւ* շաղկապին, որը, ինչպէս ընդունուած է, ամէն կրկնութեան հետ նաեւ շեշտւում է: Ինչպէս. «...արիութեան պատգամախօսները պիտ դառնան հայ մտաւոր եւ հոգեւոր կեանքի բոլոր ղեկավարները: *Ե՛ւ* դպրոց, *Ե՛ւ* եկեղեցի, *Ե՛ւ* քաղաքական կուսակցութիւններ, *Ե՛ւ* մամուլ, *Ե՛ւ* ապակուսակցական կազմակերպութիւններ ... մինչեւ որ ... հայութիւնը դառնայ ինքնապաշտպանունակ» (Հ., էջ 65): Կամ՝ 17.09.1920 թ. կոչում. «...դիակս թաղիր Խուստուպի ամենաբարձր կատարին, որտեղից երեւայ ինձ *Ե՛ւ* Ղափանը, *Ե՛ւ* Գենվազը, *Ե՛ւ* Գողթանը, *Ե՛ւ* Գեղվաձորը»¹⁰: Յաջորդ նմուշում մէկ նախադասութեան մէջ շաղկապներն ընդգծում են թէ՛ գործողութիւնը կատարողներին (ենթակայ), թէ՛ գործողութիւն կրողներին (ուղիղ խնդիր): Մէջբերումը կատարւում է 25.08.1920 թ. ՀՀ զինուորական նախարարին ուղղուած գրութիւնից. «*Եւ* այսօր այդ բոլորը, *Ե՛ւ* Ադրբեյջան, *Ե՛ւ* Ղարաբաղ, *Ե՛ւ* բուն Զանգեզուր, ոտքի

9 Տե՛ս Լ. Եզեկեան, Ոճագիտություն, Երևան, 2003, էջ 364-365:

10 Գ. Նժդեհ, Էջեր Լեռնահայաստանի գոյամարտից. Հայրենիք ամսագիր, 1924, հունվար-ապրիլ: Հետագայ յղումները՝ շարադրանքում (ԷԼԳ):

հանած իրենց բովանդակ ոյժերը՝ **Ե՛ւ** զօրք, **Ե՛ւ** տեռոր, **Ե՛ւ** թղթադրամների դե-
զեր, կաշուից դուրս են գալիս ընկճելու ... Ղափանը»:

Բազմաշաղկապությանը Գարեգին Նժդեհը դիմել է նաեւ իր քնարական
երկերում, որտեղ ոչ թէ գաղափարախօսության տարածում կամ մարտական
տրամադրություններ են, այլ՝ խոհական կամ թախծի ու ջերմության: Իրողու-
թիւնները գատգատող թուարկումները թէեւ կարելի էր բաժանել միայն ստո-
րակէտներով, սակայն հեղինակը դարձեալ օգտագործել է նաեւ շաղկապները,
որոնք ուշադրութիւնն աւելի են գրաւում հարկ եղածի վրայ, ինչը ցանկալի է
համարում. «Եւ ինձ թուում էր ... Որ **Ե՛ւ** մարդ, **Ե՛ւ** սողուն, **Ե՛ւ** թուփ, **Ե՛ւ** թռչուն,
...իմ անունն են օրհնել...» (Հ., էջ 409): Եւ կամ. «Ա՛հ, նա սիրում էր **Ե՛ւ** արշա-
լոյսը պուրպուր, **Ե՛ւ** վերջալոյսը տխուր, **Ե՛ւ** երգն անխօս ոսկեշող աստղերի...»
(Հ., էջ 413):

դ. Առանց լրացումի կամ լրացումով կրկնաբանութիւններ: Որոշակի
խօսքաշարերում կրկնութեան անդամները հանդէս են գալիս առանց լրացում-
ների եւ նոյնական յաջորդում են միմեանց: Այդպիսիք արդէն եղել են եւ դեռ
կլինեն յաջորդիւ: Մի անդամը միւսից առաւելապէս տարբերում է ինչ-ինչ լրա-
ցումներ ունենալով: Սովորաբար այսպիսին են լինում երկրորդ կամ յաջորդ
անդամները, սակաւ դէպքերում՝ առաջինը: Լրացումները բերում են իմաստա-
յին նրբագծեր, թարմ հնչեղութիւն եւ նպաստում ասելիքի ամբողջացմանը:
Եթէ կրկնուող բառերը գոյականներ են, նախորդ անդամից տարբերում են
յատկացուցիչ կամ որոշիչ ունենալով. «**Համբո՛յր**, ջերմ **համբոյր** Հայ Հայրե-
նիքին եւ իր մեծ վշտակրին...» (Հ., էջ 151), «Եւ **սովորութիւն կայ**, գրչի ու գրքի
տէր բոլոր ժողովուրդների **իմաստուն սովորութիւն կայ**, պատերազմից յետոյ
հաշիւ նստել, պարզել իրենց յաջողութեանց եւ պարտութեանց պատճառները»
(Հ., էջ 82), «**Պատմութիւնը, անկաշառ պատմութիւնն իր խօսքը, իր անէծքի
խօսքն** ունի ասելու նրանց» (ԱՄ):

Եթէ կրկնուող բառերը բայեր են, միմեանցից տարբերում են խնդիրներ
(առաւել յաճախ ուղիղ խնդիր) կամ պարագաներ ունենալ-չունենալով: Նախ
ուղիղ խնդիրների օրինակներ. «**Անցի՛ր**, հա՛յ երիտասարդութիւն, **անցի՛ր
Ռուբիկոնը**, որի հանդիպակաց ափին քեզ յաղթութեան դափնին է սպասում»
(Հ., էջ 95): «Նա **յաղթել է** այլեւս, **յաղթել** իր բանակի **անինքնավստահու-
թեանը, վախին**» (Հ., էջ 46): Եթէ գոյականների դէպքում յատկացուցիչների
համեմատութեամբ շատ ու շատ աւելի որոշիչներ ունեցող բառերն են, ապա
այժմ խնդիրների համեմատութեամբ շատ աւելի բազմաթիւ են, բազմազան
պարագաներով տարբերուող անդամները: Այսպիսիներից են. «Կուգէի, որ
այդ ամէնը **գիտակցէիր**, եւ **լա՛ւ գիտակցէիր**, ամերիկահայ ուսանողութիւն»
(Հ., էջ 257), «Եւրոպական երեք մեծ ազգերի ընտրանին վաղուց է **դատել** թուր-
քը, **դատել բարոյապէս**» (Հ., էջ 611), «Կայ մի ողբերգական թիրիմացութիւն,
որը **պէտք է փարատել - օր, ժամ, վայրկեան առաջ պէտք է փարատել**» (Հ.,

էջ 497): Երբ կրկնուողը ստորոգելիական վերադիրն է, լրացումն աղերսում է դրանցից մէկի հետ. «Արդարութիւնը ... պաշտպանելու համար **պէտք է լինել** ոչ միայն արդար, այլ եւ՝ **տղամարդ, եօթնի՛ցս տղամարդ**» (Հ., էջ 628), «**Հի՛ն է, աշխարհի չափ հի՛ն է** այդ երեւոյթը... ամէն մեծ գաղափար ունեցել է իր մանր թշնամիները» (Հ., էջ 636): «**Գռեհիկ, անհայրենասիրութեան աստիճան գռեհիկ է** ումանց հայրենասիրութիւնը» (Հ., էջ 602):

ե. ենթակայի ու ստորոգեալի կրկնութիւն: Միեւնոյն կամ կից նախադասութիւններում կրկնում է նոյն ենթական՝ ամէն անգամ ունենալով մէկ այլ ստորոգեալ, որոշ դէպքերում՝ մէկ ընդհանուր ստորոգեալ: Ուշադրութիւնը կենտրոնացում է գործողութիւնը կատարողի վրայ: Եւ կամ նոյն կերպ կրկնում է ստորոգեալը՝ ունենալով ընդհանուր, որոշ դէպքերում՝ տարբեր ենթականեր: Ուշադրութիւնը կենտրոնացում է գործողութեան վրայ: Առաջանում են իւրատեսակ բազմակի ենթականեր կամ բազմակի ստորոգեալներ: Ինչպէս. «Մխիթարական չէին եւ ինտելիգէնտ ոյժերի, ինչպէս եւ մեր կուսակցական ընկերների մի մասի փոխյարաբերութիւնները: Դժգոհ էին **բոլորը**, քննադատում էին **բոլորը**, մեղադրում ու մեղադրում **բոլորը**»¹¹, «**Հա՛յը, հա՛յն է յաղթանակած** այդ գոռ գոյամարտում» (Հ., էջ 332), «Առանձին չի լսում բոլշեփկեան հայամերժ խօսքը. այո՛, **թո՛ւրքը, թո՛ւրքը, թո՛ւրքն է** ամէն տեղ» (Հ., էջ 203): Եւ կամ. «...արցունք կար նրա աչքերի մէջ: **Լալի՛ս էին, լալիս բոլորը**» (Հ., էջ 564), «Ես **տեսել եմ** մեր **ժողովրդին** նման հոգեվիճակում. **տեսել նրան** իր բիբերի մէջ, **տեսել** խռովքոտ **տողանցն** իր սերունդերի, **տեսել** ռազմի իր **սուրբերին...**» (Հ., էջ 344), «**Կա՛յ, կա՛յ մի բան**, որ թունաւորում է մեր կարճատեւ ուրախութեան վայրկեանները ... **Կա՛յ** մի խորհրդաւոր **ձեռք ... Կա՛յ** մի պատուհասող **ոյժ...**» (Հ., էջ 93):

3. Կրկնութիւնների կիրառութիւնները: Կրկնութիւնները որպէս ճարտասանական միջոց, գործադրում են տարբեր նպատակներով: Որո՞նք են դրանք Գարեգին Նժդեհի ստեղծագործութիւններում: Մենք կանգ կառնենք առաւել յաճախ հանդիպող շարժառիթների վրայ: Բայց նախ վերյիշենք, որ գործածում են ինքնուրոյն բառերը, նախադասութիւնները, որոնք կրկնում են երկուսից տասը, սակաւ դէպքերում աւելի անգամ. լինում են խաչակերպ, հարցական բնոյթի, առանց լրացումների կամ լրացումներով: Խնդրոյ առարկայ ստեղծագործութիւններում ի՞նչ են արտայայտում այդ կրկնութիւնները:

ա. Չափ ու քանակ: Անուանական խօսքի մասերի հետ առնչուող կրկնութիւնները ցոյց են տալիս առարկաների, առարկայօրէն ըմբռնուող երեւոյթների մեծաքանակ, բազմաթիւ լինելը: Ընդ որում, որքան աւելի է կրկնութիւնը, այնքան աւելի է թուի մեծութեան տպաւորութիւնը: Երկու անգամ կրկնելով *դարևեր* բառը՝ հեղինակը նկատի է ունենում շատ դարեր, երեք անգամ կրկնելով *շուշաններ* բառը՝ շատ շուշաններ. «**Դարե՛ր, դարեր** են անցել ... Դեռ

¹¹ ՀՅԴ ԿԱ, Դատական գործ, թ. 213-230:

դրդում է Վարդանի Աւարայրեան խօսքը...» (Հ., էջ 405), «Ես տեսնում եմ ... **շուշաններ, շուշաններ**, աւելի փարթամ... **շուշաններ...**» (Հ., էջ 376): Նոյն կերպ գոյականաբար կրկնում է *նոր* ածականը, *քոյուր* դերանունը. «Թող ... դիւցազնօրէն ընկնեն **նորերն** ու **նորերը** ... մեր Հայրենիքում...» (Հ., էջ 417), «... ցեղի գաղափարն է հոգեբանօրէն միատարրում ... **բոլորին, բոլորին** » (Հ., էջ 635): Ի դէպ, *քոյուր* դերանուան կրկնութիւնը աչքի է զարնում Նժդեհի երկերում (Հ., էջ 25, 93):

Բայական կրկնութիւնները ցոյց են տալիս, թէ քանի անգամ է կատարում գործողութիւնը, ինչ չափով, երբեմն նշում է թիւը. «Ու յուզած ու մտախոհ... պատից խլեց հոր հրացանը, **համբուրեց, համբուրեց մէկ էլ, համբուրեց եօթն անգամ**, գրկեց ու...» (Հ., էջ 416), «Գի՛ղը ... բազմաչարչար որդին **կը քրտնէ, կը քրտնէ մէկ էլ, կը քրտնէ եօթն անգամ** եւ այսպիսով հողից հաց կը քամէ» (ԳԵ, էջ 11), «Կամաւորներ հասան ... Եւ **ընկան** նրանք, **ընկան** Եաւորովի հայրենիքի համար, **ընկան** ժպտաղէմ» (Հ., էջ 592):

բ. Յորդոր, խնդրանք, կոչ: Ի տարբերութիւն մէկ անգամ հնչելու, երկու կամ մանաւանդ աւելի անգամ հնչողութեան դէպքում կրկնութիւնները դառնում են առաւել ներգործուն ու յուզական: Տարբեր տրամադրութիւններով, նրբերանգներով, նպատակներով հանդիպում են բոլոր ժանրային ստեղծագործութիւններում. կան չորս-հինգ անգամ կրկնուողներ մի փոքր հատուածում: Բարեկամներին գրած նամակներում մտահոգութիւններ են արտայայտում տարբեր հանգամանքների վերաբերեալ: Ինչպէս. «**Զգո՛յ՛, զգո՛յ՛, էլի զգո՛յ՛** պիտի լինել, սիրելի Օհաննէս...»¹²: Լեռնահայաստանի գոյամարտի տարիներին մշտապէս զգացում էր սննդի, բայց յատկապէս ռազմամթերքի սպառնազին պակաս, եւ Հայաստանի հանրապետութեան զինուորական նախարարին ուղղուած գրութիւնները տանում էին աղաղակող խնդրանք. «...ռազմամթերքի սպառման վտանգը իր հրէշաւոր հասակով... տղաները **փամփուշտ, փամփուշտ եւ փամփուշտ** էին խնդրում» (26.10.1926 թ.), «**Օգնութիւն, օգնութիւն, օգնութիւն՝** իր վերջին փամփուշտը կրակող Ղափան-Գենվազին» (19.10.1920 թ.), «**Արագացրէ՛ք** ժամը, վայրկեանը ճակատագրական նշանակութիւն ունի, **արագացրէ՛ք** օգնութիւնը»¹³: Իսկ ընդհանուր առմամբ, Նժդեհի յորդորները գիտական աշխատութիւններում ու հրապարակախօսական յօդուածներում հնչում են որպէս մի-մի պատուիրան՝ ուղղած հայ ժողովրդին, երիտասարդութեանը, մտաւորականութեանը եւ բխում են նրա մի գաղափարախօսութիւնից: Ամէն, ամէն յորդոր՝ գաղափարական մի դրոյթ: «**Թոյլերին չեն յարգում, ճնշում են**»: Ելնելով սրանից՝ իր տարբեր երկերում նա քարոզում է մոռանալ թուլութիւնը: Ահա մասնաւորապէս սիւնեցիներին ուղղուած պատուիրաններից վերջինը՝ «Ազատ Միւնիք» յուշագրութիւնից. «Եղի՛ր **ոյժեղ**, էլի՛ **ոյժեղ**

12 Գ. Նժդեհ, Նորահայտ նամակներ, Երեւան, 2011, էջ 11:

13 ՀՀՊԱ, ֆ. 198, ց. 1, գ. 73, թ. 7, շրջ.:

ու միշտ **ոյժեղ**»։ Սա համարում է հոգեբանական պաշտպանության միջոց։ Միս յորդոր-պատուիրանը՝ «Խորհրդածություններ» յօդուածից. «Ժողովորդ, ...երդուեցնում եմ սերունդներիդ - **չներե՛լ, չներե՛լ** թուրքին... ներում են թշնամուն, բայց ո՛չ եւ իր կեսի սպանիչին...» (Հ., էջ 568)։ Երրորդ պատուիրան-յորդորն ուղղուած է հայ ցեղային զգացողութիւնը մոռացողներին, որ դարձեալ արծարծում է տարբեր երկերում, իսկ «Հայու ճամբան՝ մեծ գղջումի ճամբան» յօդուածում՝ հետեւեալ կերպ. «... - փորձեցին սպանել ցեղը հայութեան մէջ՝ ոչնչացնելով մեր ազգի ցեղազգաց տարրը։ **Չմոռանա՛նք, չմոռանա՛նք, չմոռանա՛նք** այդ իրողութիւնը...» (Հ., էջ 618)։ Ցանկանալով, որ երիտասարդութիւնը ճանաչի ինքն իրեն, իր կարողութիւնները՝ «Որդիների պայքարը հայերի դէմ» աշխատութեան հինգերորդ՝ «Ինքնաճանաչութիւն» մասում երեք անգամ կոչ է անում. «**Ծանի՛ր զքեզ**» (Հ., էջ 96, 98)։ Եւ ապա համընդգրկուն ու քաջալերիչ կոչը՝ *ապրե՛լ*, որ հնչում է «Ցեղային արթնութիւն» աշխատութեան հինգերորդ խօսքում, մէկ նախադասութեան մէջ՝ հինգ անգամ. *ապրե՛լ*, ինչպիսին էլ լինի հոգեբանական վիճակը, յանուն գաղափարի. «Բայց եւ այնպէս պէտք է **ապրել, ապրե՛լ** անհանգիստ հոգիով, **ապրե՛լ** թրքական եղեռնի ամբողջ յիշողութեամբ, **ապրե՛լ** ցեղօրէն, **ապրե՛լ** ամօթ համարելով մէկուսի եւ եսական երջանկութիւնը...» (Հ., էջ 500)։ Ընդհանրապէս, կրկնութեամբ չորս-հինգ կամ աւելի անգամ հնչող յորդորանք-կոչերը կամ կոչ-յորդորանքները մշտագոյ եմ մարտագրերում ու մարտական հրամաններում՝ յարձակում սկսելուց առաջ, ուղղուած զինուորութեանն ու բնակչութեանը՝ իւրաքանչիւր դէպքում կրկնութեամբ ուշադրութիւն հրաւիրելով տուեալ պահին առաւել կարեւոր հանգամանքի վրայ (Հ., էջ 421-423)։ Սակայն այսպիսի մարտակոչերը ոգեշնչում են ոչ միայն ռազմադաշտում կռուողներին։ Նոյնպիսի մարտակոչեր կան գիտական աշխատութիւններում՝ ուղղուած հասարակութեանը։ Մէքերենք երկու հատուած «Բանտային գրառումներից», առաջինը «Ռազմական խոհեր» մասից, որտեղ վեր է հանում յանուն գաղափարի մարտի նետուողների վեհութիւնը եւ նրանց կռում ոգեւորելու՝ ղեկաւարի ունակութիւնը. «**Ի զէ՛ն**։ Որքան թափ ու թեւ կայ այդ սեղմ խօսքի մէջ։ Քիչ լեզուների է տրուած հայոց այդ մի գոյգ բառերի արտայայտչական թափը։ **Ի զէ՛ն** - վազներեան մի ամբողջ սինֆոնիա է դա, հերոսական խելայեղիչ մի մարշ... - **Ելէ՛ք, ելէ՛ք**, կռուի **ելէ՛ք** նորէն... - **Ի զէն...** եւ կ'ուզէի այդ ռազմականը շրթունքներիս մեռնել...» (Հ., էջ 395-396)։ Հատուածը կառուցուած է երկու կրկնութեամբ՝ *ի զէն* եւ *ելէք*։ Երկրորդը աշխատութեան վերջնամասից է՝ «Իմ տապանագիրը» յաւելուածից։ Հեղինակը դիմում է իր հողաթմբի առջեւ կանգ առնող անցորդին, այն է՝ հասարակութեանը. «**Անցո՛րդ, ...դու լալի՛ս ես... Ի մա՛րտ, անցո՛րդ, ի մա՛րտ**, որպէսզի տարաբնակ հայը՝ հայրենադարձ, եւ մեր մեռելները գերեզման ունենան։ **Ի մա՛րտ ...**» (Հ., էջ 407)։

Ընթերցող հասարակութեանն ուղղուած այսպիսի ռազմակոչերը նոյնքան

բորբոքում են, որքան Սիւնիքի բնակչութեանը ուղղուածները՝ գոյամարտի տարիներին: Հետեւեալ նմոյշը կառուցւած է նախորդներից տարբեր՝ մէկ այլ եղանակով՝ տրական յօլովով գոյականային բառաձեւերով. «**Ոտքի՛**, խաբւած ժողովուրդ, **ոտքի՛** ել, փրկութիւնդ մօտ է: **Ոտքի՛**, զենքը ձեռքիդ...» (Հ., էջ 426):

Եւ այսպէս. յորդորները, կոչերը Գարեգին Նժդեհի երկերում կառուցուած են չորս կարգի կրկնութիւններով՝ հրամայական եղանակի բայաձեւերով, անորոշ դերբայներով, /ի/ նախդրաւոր բառակապակցութիւններով, տրական յօլովով գոյականային բառաձեւերով:

գ. Ժամանակ ու տեւականութիւն: Կրկնութիւնների միջոցով ցոյց է տրուում գործողութեան կատարման ժամանակը կամ տեւական բնոյթը: Որոշակի դէպքերում ուշադրութիւն է հրաւիրում յատկապէս որեւէ մասնակի ժամանակահատուածի վրայ. «Զինուորներ, ...**Վաղը**, երբ Ձեր խենթ ... զարկերից թշնամին կը թողնի իր գլուղերը **Վաղը**, երբ հայ գերիները ... ծնկաչոք կ'աղօթեն ... **Վաղը**, երբ քաջերդ Աջիբաջ հասաք, յիշէք Խալիլբեգեան սեւ օրերը... Յիշէք այդ եւ եղէք անխնայ...» (1919, 30 նոյեմբեր, հրամանից, Հ., էջ 420): Կամ. «Ինքնապաշտպանութիւն... պիտ կրկնեն... կրկնեն անվերջ... **մինչեւ որ** արիական ինքնապաշտպանութեան գաղափարը դառնայ ժողովրդական մտայնութիւն... հոգեբանութիւն, **մինչեւ որ** հայութիւնը դառնայ ինքնապաշտպանունակ» (Հ., էջ 64-65): Համապատասխան ժամանակային բայաձեւերի միջոցով կրկնութիւնները ներառում են ընդհանրական կերպով անցեալն ու ներկան, ներկան ու ապագան, անցեալն ու ապագան: Մասնաւորապէս, հետաքրքրական են այն նմոյշները, որոնք ընդգրկում են անցեալը, ներկան եւ ապագան. «Նա (հակադաշնակցականը) **չհասկացաւ, չի հասկանում եւ պիտի չհասկանայ** մեր մեծագործ ցեղի խոյանքների իմաստն ու արժէքը» (Հ., էջ 199), «Ազգերն **ունեցել են, ունեն ու պիտի ունենան** իրենց արժանի ճակատագիրը» (Հ., էջ 113), «Հայրենիք... Դա, հայրենի հողը լինելուց զատ... միութիւն է նաեւ նրանց հետ, որոնք **ապրել են, որոնք կապրեն** եւ որոնք **պիտ ապրեն**» (Հ., էջ 114):

Գործողութեան տեւականութիւնը եւս ցոյց է տրուում բայի կրկնութեամբ. «Նա (դաշնակցականը) չի հաւատում... նպաստաւոր պայմանների «կախարդական» ոյժին - նա **աշխատում է, աշխատում եւ աշխատո՞ւմ**» (Հ., էջ 235), «...նա, (Գեղէոն Տէր-Մինասեանը) **գրում է, գրում է**, որովհետեւ իրեն ապսպրուած է **գրել**, որովհետեւ չի կարող **չգրել...**» (Հ., էջ 282), «Նա (ժողովուրդը) **կռուել է, անդադրում կռուել...** Բայց եւ այնպէս նա **ապրել է, ապրել է**, որովհետեւ ունեցել է վեհ հաւատ»¹⁴:

դ. Զայրոյթ: Զայրոյթը Գ. Նժդեհի երկերում արտայայտուում է նաեւ ճարտասանական հարցերի միջոցով: Այժմ էլ կրկնութեամբ կարելի է ասել, որ Նժդեհը ունէր, ունէր, ունէր պատճառներ զայրանալու: Արդ, անդրադառնանք պատճառներից մի քանիսին. Ինչպէ՛ս է արտայայտուում զայրոյթը կրկնու-

14 ՀՀ Դաշնակցութեան բիւրոյին: ՀՀՊԱ, ֆ. 198, ց. 1, գ. 73, թ. 19-20:

թիւնների միջոցով: Դրանցից մէկը 1921 թ. փետրուարի 1-ին 11-րդ բանակի զինուորայեղափոխական խորհրդի անդամ Հեկկերից ստացած գրութիւնն է, որին պատասխանում է բաց նամակով: Նախ թուարկելով 11-րդ բանակի՝ Ղարաբաղին, Սիւնիքին, Վայոց ձորին հասցրած չարիքները, Նժդեհը գրում է նաեւ. «Ձեր դաւադրութեամբ Հայաստան երկիրը դարձաւ Քեմալստան»: Ապա բացայայտում է թշնամու պատերազմի մարտավարութիւնը: Նրա իւրաքանչիւր ամօթալի միջոցից առաջ, այն է՝ խաբէութիւն, թալան, ահաբեկչութիւն, սադրանք, հակառակորդի երեսին է ութ անգամ նետում «*Ոյժեղը նա է...*» շարահիւսական յարակրկնութիւնը (ԱՍ): Գարեգին Նժդեհը պարտուողական մտաւորականութեանը մեր ժողովրդի ամօթն էր համարում. նրա հոգու ցաւոտ տեղերին էին դիպչում այն առաջարկները, թէ պէտք է ներել թուրքին, հաշտուել ու մերձենալ նրա հետ: Այս կապակցութեամբ նա որոտում է «Որդիների պայքարը» աշխատութեան մէջ. «**Ներե՛լ** նրան, որից ծեծւել ես, թքւել, անարգւել: **Ներե՛լ** նրան, որին քեզնից ուժեղ ես զգացել եւ ծունկի եկել նրա առջեւ: **Ներե՛լ** իր բռնակալին... Ինչպիսի մահացու տգիտութիւն եւ բարոյական անկում: Իսկ եթէ թրքութիւնը, հայ պարտուողական, ...թեք քո եւ քո ներումի երեսին» (Հ., էջ 135): Զայրացուցիչ էին 1920-30-ական թուականների հայութեան ներքաղաքական կեանքը, կուսակցութիւնների գործունէութիւնը, մամուլը: Շարունակելով իր վերն արտայայտած միտքը՝ պարտուողական մտաւորականի կեցումաձքը որակում է իբրեւ *ժողովրդասպանութիւն*: Այս որակումին նա անդրադարձաւ նաեւ երկու տարի յետոյ՝ 1929 թ. «Բաց նամակներ հայ մտաւորականութեան» աշխատութեան մէջ՝ գրելով. «...շարունակում են նեղսիրտ եւ իրարամերժ կռիւր... կատարում այն, ինչ որ պէտք է արտաքին թշնամուն: Եւ այդ ամէնը միամտօրէն կոչում են ժողովրդասիրութիւն, երբ էապէս **ժողովրդասպանութիւն է տեղի ունեցողը** (ընդգծումը Նժդեհինն է): Այո, **ժողովրդասպանութիւն**» (Հ., էջ 69-70): Իսկ լրագրութեան բնոյթը զայրացկոտ խօսքերով ներկայացուած է «Բաց նամակներ...»-ի Ե. մասում եւս: Եօթ պարբերութիւն սկսում է *Լրագրութիւն* բառ-յարակրկնութեամբ, որին յաջորդում է հերթական արատը եւ դրա վերլուծութիւնը՝ ճշմարտութիւնը գտնելու անկարողութիւն, քծնութիւն, արհամարհանք ազգայինի նկատմամբ, թայֆայականութիւն, ազգերին ուղղուած հայիոյաբանութիւն, դիւանագիտական մակերեսայնութիւն... Եւ ապա եզրակացնում է. «Այսպիսի **լրագրութիւնը** աւելորդ է հայ ժողովուրդին» (Հ., էջ 67-68):

Ե. Դիմում: Հեղինակը, տարբեր շարժառիթներով դիմում է ժողովրդին, բնակչութեանը, երիտասարդութեանը, ընթերցողներին, նաեւ անհատներին, ներկա դէպքում՝ կրկնութիւնների միջոցով: Դիմում արտայայտելու համար գործածուած են կոչականները, որպէս ենթակայ՝ երկրորդ դէմքի դերանունը, ճարտասանական հարցերը՝ կոչականով կամ առանց կոչականի՝ երկրորդ դէմքի բայածեւերով: Ռ՛րտեղ պէտք է առաջին հերթին փնտրել կոչականներով

դիմումներ, եթե ոչ գրություններում ու «Խուստուպեան կանչեր» շարքի հրամաններում ու կոչերում՝ ուղղուած զինուորութեանը, սիւնեցիներին՝ լի յուզումնաթրթիռ զգացմունքներով, սպասումներով կամ զայրոյթով: 13.05.1920 թ. կոչում որպէս դիմում-յարակրկնութիւն հնչում է *ղափանցինէ՛ր* բառը՝ երկու անգամ, 12.02.1920 թ.՝ *զինակիցինէ՛ր*՝ երեք, 05.10.1920 թ.՝ *Ղափան*՝ երեք, 19.09.1920 թ.՝ *ընկերինէ՛ր*՝ երեք, 17.09.1920 թ.՝ *Ժողովուրդ*՝ տասն անգամ: Մէջբերենք վերջին կոչը՝ որոշ կրճատումներով: *Ժողովուրդ* կոչականը մերթ հնչում է նախադասութիւնների սկզբում՝ իբրեւ յարակրկնութիւն, մերթ նախադասութիւնների միջնամասում՝ իբրեւ միջնակրկնութիւն, եւ մերթ նախադասութիւնների վերջում՝ իբրեւ վերջնակրկնութիւն. «Ղափանի **Ժողովրդին** - **Ժողովուրդ**, քեզ հետ խօսողը քո հրամանատարն է... դու կանչեցիր ինձ, եւ ես հասայ քո հաւարին: Ասա՛, **Ժողովուրդ**, այն օրէն քո երկրում մնա՛ց... մի քար, որի վրայ դրած չլինէի իմ յոգնած գլուխը: Դեռ չեն փակուել թշնամու՝ ինձ հասցրած վերքերը, իսկ քոնը, **Ժողովուրդ**, քո հասցրածը միշտ թարմ պիտ մնայ... **Ժողովուրդ**, այսօր ... դու ... լքում ես, մէնակ թողնում քո վիրաւոր հրամանատարին: ...Քո լրտեսները ... իմ գլուխն են փնտրում՝ երեք միլիոնով Ադրբէյջանին ծախելու: Ապերախտ **Ժողովուրդ**: ...Վա՛յ քեզ, **Ժողովուրդ**, ի՞նչ պատասխան պիտ տաս Աստծուդ... **Ժողովուրդ**, կ'անցնեն օրեր, թշնամին... կը սկսի ... բնաջնջել քեզ: ...**Ժողովուրդ**, ինձ լքելուց ... առաջ զլացար իմ խնդիրը կատարել... Ներում եմ, թէ եւ պատմութիւնը չի ների քեզ եւ խնդրում՝ երբ ինձ սպանուած գտնես, դիակս թաղի Խուստուպի ամենաբարձր կատարին... Աստուած եւ իմ սերը քեզ հետ, ապերախտ **Ժողովուրդ**» (Հ., էջ 425-426):

Ներկայ պահանջով հարկ է առանձնացնել «Քանտային գրառումները»՝ «Իմ տապանագիրը» վերնագրով ենթագլուխը: Կէս էջից էլ պակաս հատուածում *անցորդ* կոչականը գործածուած է վեց անգամ, *կանգ առ* հարադիրը՝ երկու անգամ՝ *յո՛ւն ես, գերեզման եմ ուզում, ասա՛, ի մարտ* բառերից յետոյ (Հ., էջ 407):

Դու ենթակայի կրկնութեամբ դիմումներ կան ուղղուած երիտասարդութեանը եւ անհատների: Առաջինը, իհարկէ, մի քանի առիթներով նախ «Որդիների պայքարը հայրերի դէմ» աշխատութեան մէջ. «Դ՛ու, երիտասարդ գրողներ, **դո՛ւ**, որ հրամայողաբար պիտ լինես ուժեղ, **դո՛ւ** եւս ապաւինիր վսեմ մտածումի փրկարար ոյժին» (Հ., էջ 102):

Անհատներին դիմումի առումով յիշարժան են հետեւեալ հատուածները Գարեգին Նժդեհի՝ Տրաքանովին ուղղուած նամակից եւ Լեապոլի դագաղի առաջ նրա արտասանած դամբանականից. «Դ՛ու էլ, **դո՛ւ** էլ, երբ խօսում էք մի գետի, մի պուրակի, մի լեռան մասին, ոգիանում է, լեզու առնում ո՛ղջ բնութիւնը» (Հ., էջ 593): «Դ՛ու է՛լ, **դու էլ** կարող էիր հարուստ լինել, բայց ապրեցիր աղքատ եւ մեռար մենաւոր...» (Հ., էջ 597):

Հարցերի ու կրկնութիւնների միատեղումը նոյն նախադասութեան մէջ,

որպես դիմում արտայայտելու միջոց, տարածուած իրողութիւն է: Այդպիսին է, օրինակ, հետեւեալ հատուածը դարձեալ «Որդիների պայքարը հայերի դէմ» աշխատութիւնից՝ դարձեալ ուղղուած երիտասարդութեանը. «Հայ երիտասարդութիւն, վաղը, երբ թրքութիւնը փորձեց պղծել Հայրենիքիդ սահմանների սրբութիւնը, **պիտ կարողանա՞ս** աւելի սարսափելի լինել, քան թշնամին: **Պիտ կարողանա՞ս** վագրային կեցածք ցուցադրել: Պատասխանիր, **պիտ կարողանա՞ս...**» (Հ., էջ 132): Կամ վերը մէջբերուած կոչից՝ ուղղուած Սիւնիքի բնակչութեանը. եւ կամ Մայքլ Արլէնին ուղղուած հետեւեալ ճարտասանական դիմումը. «**Չգիտէ՞ք...** որ տողերը կարող են արդարացնել օտար ժողովուրդների արհամարհանքը դէպի հայ դատը: **Չգիտէ՞ք**, որ ձեր ծանօթ տողերը կարող են ինքնանուաստացումի մղել օտար ամերիկացի վրայ ծուարուած հայութիւնը...» (Հ., էջ 472):

գ. Ընդգծում: Թերեւս կրկնութիւնների ամենալայն կիրառութիւնն է: Շեշտում են կոնկրետ զգացումը, առարկան, երեւոյթը, պահանջը, համոզումները, յատկանիշը, գործողութիւնը... Ընթերցողի ուշադրութիւնն է գրաւում կրկնուող բառը, ըստ որում՝ ինչքան յաճախ, այնքան սեւեռուն կերպով: «Դաշնակցութեան պանթէոնը» շարքի «Գերեզմանատանը» խոհագրութեան մէջ ընդգծում է քնարական հերոսի շուտափոյթ, հնարաւորին չափ արագ հեռանալու ցանկութիւնը՝ երեք անգամ կրկնելով **փախչել** բայը. «...հոգիս խեղդող թախծի գիշերն աւելի սե՛ն, աւելի ճնշող է դառնում... Եւ ուզում եմ ճշալ ու **փախչել** ես... **Փախչել** աշխարհից... հեռո՛ւ, շատ հեռո՛ւ... **Փախչել**՝ դուրս գալ աշխարհից...» (Հ., էջ 415): Ս. Վրացեանին գրած նամակում Նժդեհը ուշադրութիւն է հրաւիրում գաղափարի մարդկանց պակասի վրայ. «Բայց կար **մարդը**, ...ընկեր Վրացեան, **մարդը**, գաղափարի աստուածաշունչ **մարդն** է մեռել, **մարդն** է պակասում մեզ... այս անփառունակ եւ կոշմարային օրերում»¹⁵: Իսկ «Տարածուող Անին» յօդուածում, վեց անգամ կրկնելով **օգնութիւն** բառը, ուշադրութիւն է հրաւիրում տարագիր դարձած հայերի փրկութեան վրայ. «...հարիւր հազար հայեր իրենց հայեացքն ականայից կը դարձնեն դէպի հայ գաղութները: **Օգնութեան** կը կանչեն, **օգնութիւն** կը սպասեն, **օգնութիւն**՝ շուտափոյթ, սրտաբուլիս եւ լիաբումն: Ուշացա՞նք մենք - **օգնութեան** կը փութայ մահը» (Հ., էջ 448): «Իմ պատասխանը» յուշագրութեան հինգերորդ մասը կարդալիս զգացում է, թէ որքա՛ն միայնակ է եղել Սիւնիքը. «...Սիւնիքի դրութիւնը աւելի եւս պիտի ծանրանար: Այժմ դա կտրուած էր ամբողջ աշխարհից: Դա **մենակ** էր այժմ, ողբերգօրէն **մենակ**, **մենակ** քաղաքականապէս, անգիմակից՝ կռուադաշտում» (Հ., էջ 301): Բայց եւ տարածում են եզրափակիչ յաղթական ակորդները. «**Պիտի յաղթել, պիտի յաղթել** գոյութեան իրաւունքը չկորցնելու համար» (ԼԳ): Նոյն կերպ նաեւ ուրիշ-ուրիշ ընդգծումների պահանջով: Ահա այդպէս «Բանտային գրառումներ»ի 12-րդ մասի մի հատուածում չորս անգամ

¹⁵ ՀՅԴ ԿԱ, Ս. Վ. 5, 22:

կրկնելով *անուն* բառը՝ իւրաքանչիւր դէպքում մատնանշելով մի կարեւոր հանգամանք՝ առաքինի մի կողմ, ընթերցողին է ներկայացնում Վարդան Մամիկոնեանին, վերջին՝ չորրորդ յիշատակման մէջ գրելով. «**Մի անուն** - մի ամբողջ դաւանանք, մի ո՛րխտ, մի բարոյական իմաստասիրութիւն» (Հ., էջ 404): Ի հակադրութիւն հայրենանուէր մարդու՝ «Որդիների պայքարը հայրերի դէմ» աշխատութեան հինգերորդ մասում ներկայացւում է սեփական, առօրեայ հաճոյքների համար ապրող անձը՝ հինգ անգամ *նա* դերանուան կրկնութեամբ. իւրաքանչիւր դէպքում նշւում է մի արատ՝ վերջում սպասելի եզրահանգմամբ. «**Նա** դառնում է մեռեալ թիւ եւ ոչ ստեղծագործող անհատ իր ժողովրդի համար» (Հ., էջ 99):

* * *

Ամփոփենք: Որպէս կրկնութիւն (կրկնաբանութիւն) Նժդեհի երկերում հանդէս են գալիս ինքնուրոյն բառերը, բառակապակցութիւնները, նախադասութիւնները, որոնք կրկնւում են 2-10, սակաւ դէպքերում՝ աւելի անգամ՝ կան յաջորդելով միմեանց, կան փոքր ու մեծ ընդմիջումներով: Ըստ բնոյթի լինում են հարցական, պարզ կան երկրորդական լրացումներով: Արտայայտում են առաւելապէս՝ քանակ, յորդոր, ժամանակ ու տեւականութիւն, զայրոյթ, դիմում, ընդգծում:

Քննութեան առնելով Գ. Նժդեհի կրկնութիւնները՝ ինքնաբերաբար պահանջ է առաջանում զուգայեռ անցկացնելու չափաժողով յարակրկնութիւնների ու վերջնակրկնութիւնների վարպետ Համո Սահյանի հետ: Միալուած չենք լինի, եթէ ասենք, թէ նրա գրեթէ ամեն բանաստեղծութեան մէջ կան կրկնուող տողեր կամ բառեր, որոնք մշտապէս այնքա՛ն տեղին են ու ներդաշնակ համաբնագրի ընդհանուր հիւստւածքին: Դժուար է ցոյց տալ մէկ այլ հայ բանաստեղծի, որի ստեղծագործութիւններում նոյնպիսի հետեւողականութեամբ ու նոյնչափ համատարած լինեն կրկնութիւնները: Ահա արձակում նոյնը պետք է ասել Գարեգին Նժդեհի վերաբերեալ: Ոչ մի այլ հայ արձակագիր այսպիսի յաճախականութեամբ ու ստեղծագործօրէն չի դիմել *կրկնութիւններ* ոճական միջոցին: Ըստ որում, ասուածը վերաբերում է ոչ միայն Նժդեհի արձակ բանաստեղծութիւններին կամ հրապարակախօսական յօդուածներին, այլեւ գիտական աշխատութիւններին ու պաշտօնական գրութիւններին, ինչը հարկ է ընդգծել: Այլ է գեղարուեստական խօսքը (մանաւանդ քնարականն ու հերոսականը) իր հնարաւորութիւններով, որոնք բխում են այդպիսի ստեղծագործութիւնների բնոյթից, եւ այլ՝ գիտականն ու պաշտօնականը, որտեղ կրկնութիւններ չեն ենթադրում:

РЕЗЮМЕ

В сочинениях Г. Нждеха более часто употреблены лексические, сравнительно меньше – синтаксические и редко – фонетические редупликации. Встречаются все проявления редупликаций: анафоры, эпифоры, хаизмы, симплоки, полисиндетоны (многосоюбие). Без интервалов следуют друг другу 2-3, а с интервалами, например в рамках одной маленькой статьи, от 2 до 15 редупликаций. Определенные словосочетания повторяются в инверсионных расстановках. Часто редупликации конструируются в виде вопросительных предложениях. С помощью исследуемого стилистического средства в сочинениях Г. Нждеха выражаются количество и мера, увещание и призыв, время и длительность, обращение, подчеркивание, а так же настроения – гнев, отрицательное отношение, восторг.

SUMMARY

In his works, Karekin Nezhdeh more frequently used lexical, comparatively rarely – syntactic and rarely – phonetic reduplications. One can find all the expressions of reduplication: anaphora, epiphora, chiasmus, symploce, polysyndeton. 2-3 reduplications succeed each other without intervals and as to the reduplications with intervals, in the frame of one short article, for example, one can find from 2 to 15 ones. Certain word combinations are repeated in inversions. Frequently, reduplications are made in the form of interrogative sentences. With the help of the stylistic device under consideration, quantity and measure, exhortation and call, time and duration, appeal and emphasis, as well as sentiments – fury, negative attitude and admiration are expressed in the works by Karekin Nezhdeh.